

Qalam

Bilangan 77 Jamadilawal 1376 Disember 1956 60 sen

Perkara Terusan Suez

Terbit daripada sikap Mesir menjadikan Terusan Suez sebagai hak kebangsaan Mesir beberapa bulan dahulu mengakibatkan satu kegentingan yang hebat di antara kerajaan-kerajaan barat dengan kerajaan Mesir – khususnya dengan British dan Perancis yang memandang bahawa tali penghidupan kerajaan-kerajaan itu dalam bahaya bagi perkembangannya pada masa yang akan datang.

Entah bagaimana kerajaan British dan Perancis -kedua-dua kerajaan yang dikatakan masyhur tentang kebijaksanaannya dalam siasah – setelah melihat perselisihan-perselisihan yang berlaku diantara Israel dan Mesir dan setelah melihat Israel menyerang Mesir telah menghantarkan angkatannya untuk menyerang Mesir dengan tujuan hendak menduduki semula terusan itu dengan “berpandukan” undang-undang yang tertentu bahawa apabila Terusan Suez dipandang terugut maka kedua-dua buah kerajaan itu berhak menghantarkan tentera-tenteranya mengawal terusan itu daripada diduduki oleh kerajaan asing.

Dengan alasan itulah maka kerajaan British menghantarkan tenteranya untuk menduduki Terusan Suez dan sudahpun mereka dapat menduduki Port Saïd. Tetapi perbuatan-perbuatan mereka itu bukannya sahaja dibantah oleh negeri-negeri di Timur Tengah tetapi juga oleh kerajaan-kerajaan lain seperti Amerika dan negeri-negeri Asia Tenggara dengan disokong pula oleh puak-puak pembangkang di negeri Inggeris

yang mengatakan bahawa perbuatan-perbuatan kerajaan itu adalah akan merosakkan kedudukan dan taraf Britain di mata dunia pada masa yang akan datang. Ini dipandang: kalau dahulu empayar British telah bertukar dengan Komanwel maka sekarang Komanwel yang dipertahankan itu akan rosak juga dengan langkah-langkah yang tersebut.

Pada permulaannya Presiden Eisenhower sendiri telah menyatakan bahawa perbuatan ini harus akan menjadikan perang Dunia yang ketiga dan kerajaan-kerajaan itu sendiri kelak akan bertanggungjawab untuk mengeluarkan dirinya daripada satu kancang peperangan dan Amerika tidak akan campur tangan di dalamnya.

Apabila kegentingan itu bertambah hebat dengan hantaran-hantaran tentera yang melumpuhkan kerajaan Mesir maka suara Beruang Merah timbul, mengugut bahawa jika tidak diselesaikan perkara itu dengan segera dan tentera-tentera asing tidak dikeluarkan dari Suez atau dari tanah Mesir maka Beruang Merah akan menghantarkan *volunteer-volunteer*nya yang telah siap sedia di sempadannya untuk diterbangkan ke Mesir – membantu Mesir.

Daripada ugutan ini dunia mengerti dan nampak bahawa apabila diluluskan tentera Beruang Merah itu masuk ke Timur Tengah ertiinya kedudukan-kedudukan semakin keruh lagi dan pengaruh Merah yang ditakuti merebak ke sana tentulah akan lebih-lebih menjadi bahaya lagi keselamatan-keselamatan pada masa yang akan datang dan kerana itulah Pertubuhan Bangsa-bangsa dengan segera mencari jalan menuntut supaya diadakan penyelesaian. Pada masa rencana ini ditulis pihak-pihak yang berkenaan telah bersatu jiwa bahawa polis bangsa-bangsa hendaklah didudukan di sana untuk mengawal keamanan dan kesejahteraan sementara perkara-perkara perselisihan itu dirunding dan dibahaskan oleh pihak-pihak yang berkenaan.

Kita tidak akan mengatakan atau mencampuri perkara ini lebih jauh tetapi hanya memerhati bahawa kejadian

yang berlaku itu nampak dan zahir akan kegopohan kerajaan British dalam menyelesaikan masalah terusan Suez itu membawa kesan kepada dunia bahawa ahli-ahli diplomat British tidak dapat lagi mengendalikan diplomasinya dalam menghadapi keadaan-keadaan luar negerinya.

Hal ini terbit daripada tunjuk-tunjuk perasaan dan keluarnya beberapa orang menteri British yang difikirkan oleh mereka kurang saksama mengeruhkan lagi keadaan yang sudah memang keruh yang boleh diselenggarakan dengan cara yang lebih baik sekalipun keadaan-keadaan mencapak kerajaan British telah dilakukan oleh Jamal Abdul Nasir.

Kejadian ini dengan sendirinya mengenai kedudukan yang berlaku di negeri Islam Timur Tengah itu. Mereka mengetahui bahawa pertalian antara kerajaan Inggeris dengan kerajaan-kerajaan Islam di Timur Tengah banyak retaknya dalam masa-masa yang lampau dan hendaknya di masa-masa yang akhir-akhir ini janganlah retak-retak itu dibesar-besarkan lagi.

Hendaknya dicari satu jalan yang halus dan bijaksana untuk merapatkan pertalian itu. Umat Islam umumnya tidak layan harapan mereka, ketika melihat perkembangan-perkembangan yang ada di sebalik layar perjuangan itu, berharap bahawa suatu peperangan yang ketiga tidak akan berlaku dan mereka mengetahui bahawa menang atau kalah dalam perjuangan itu penderitaan akan menimpa negara-negara Islam itu – kalau kalah akan termasuk ke dalam mulut buaya dan kalau menang akan termasuk pula ke dalam mulut harimau sedang masa ini kedudukan negara-negara Islam masih lagi dalam binaan. Dengan kerana itulah kerajaan-kerajaan Islam berharap, langkah-langkah yang dilakukan dengan menggunakan senjata terhadap negeri-negeri itu akan meletakkan suatu bahaya dan menghilangkan suatu kepercayaan kepada blok barat yang akan menjauhkan negara-negara Islam daripada blok merah. Kerana dengan sendirinya dengan kejadian yang berlaku di hadapan kita

sekarang pengaruh merah, kerana jasa-jasanya, akan menghantarkan tentera merah mempertahankan negeri kecil daripada langgaran kuasa-kuasa besar tentulah dipandang sebagai suatu budi dan tiap-tiap satu budi itu jika telah diterima tentulah padahnya layan tidak – kalau dahulu dipandang lawan kerana bahaya idealoginya tetapi sekarang dipandang kawan – dan apabila berkawan idealoginya itu akan termasuk.

Siapa yang salah dalam perkara ini bukanlah kita yang menghakimkan tetapi harapan kita semata-mata bergantung kepada doa mudah-mudahan janganlah hendaknya berlaku perang dunia yang ketiga sebab di telinga kita masih terdengar lagi penderitaan-penderitaan dan jeritan-jeritan akibat daripada bencana perang yang lalu.

* * *

Peringatan Kepada Pengundi-pengundi

Dalam majlis mesyuarat Persekutuan Tanah Melayu kerajan Perikatan telah mengemukakan belanjawan merdeka iaitu belanjawan bagi tahun 1957. Untuk menutup kekurangan-kekurangan maka cukai-cukai terpaksa dinaikkan dan dengan kerana itu maka 55 orang daripada 90 orang ahli-ahli majlis itu, yang kita percaya, mereka berpendapat sebagai wakil rakyat, mengulas dan bercakap dalam perkara itu. Melihat ulasan-ulasan yang setengah-setengahnya kencang dan menghendaki belanjawan itu ditolak maka ketua menteri Tengku Abdul Rahman, dikatakan, telah menyatakan bahawa penolakan belanjawan itu bermakna tidak adanya kepercayaan kepada kerajaan Perikatan dan ia menghendaki supaya belanjawan itu diterima dengan tidak ada pindaan, kalau tidak kerajaannya akan meletakkan jawatan.

Perwakilan-perwakilan, yang hampir semuanya terdiri dari ahli-ahli perikatan, mendengar ugutan Tengku itu semuanya

(sambungannya di muka 46)